

Thursday, April 3, 2025

Time - 2:30pm - 2:35pm

REGIONAL NEWS BULLETIN

(MIDDAY)

GOVERNOR

Larsap General (Rtd) Vijay Kumar Singh chuan vawiin khan kumin Republic Day lawmna pui ber, New Delhi-a Republic Day Camp (RDC) 2025 a tel Mizo NCC Cadet 6, mipa 4 leh hmeichhia 2 te chu Raj Bhavan-ah kawmin lawmpuina thilpek tablet a hlan.

Larsap chuan ngaihhlut hlawh tak Republic Day Camp-a telpha leh Mizoram tihmingthatu NCC Cadet 6 te chhuanawm a tih thu sawiin, midangte tana entawntlak leh NCC zawm an chak ve zel theih nana hmahruaitu nih tum turin a chah a. NCC chu hna zawn nana pawimawh tak a nih mai piah lama mitha leh chhawrtlak chherchhuaktu a ni tiin NCC cadet-te chu tuna hlawhtlinna an chanah tawp mai lova, hmabak an neihte tha taka hlen tum tura fuihin, hlawhtlinna dangte pawh hmu zel thei tura tan la sauh sauh turin a chah a ni.

Republic Day Camp 2025-a Mizoram atanga telte hi 1st Mizo Battalion NCC atangin Junior Under Officer Jacksy Lalhlmsangi leh Cadet Laltlanhlua, 2nd Mizo Battalion NCC atangin Cadet Asraful Haque Laskar, 1st Mizo Air Squadron NCC atangin Cadet Rohit Kumar, Cadet F. Malsawmtluanga leh Cadet Lalremruati te an ni a. Ngaihhlut hlawh tak Kartavya Path, PM Rally, Line Area leh Youth Exchange Programme ah te an tel a ni.



DGP

Mizoram DGP Anil Shukla chuan ram thenawm Myanmar leh Manipur buaina avangin Mizoramah dan lova lut ruihhlo leh kuhva ro a hluar hle a ti a, hemi tih tawp tumin Mizoram Police ten theihtawp an chhuah thin tih a sawi.

Akashvani palai nen an inkawmna ah he thu hi sawiin Deputy General of Police Pu Anil Shukla chuan Mizoram chu venhimna kawngah ram ralmuang tak anih avangin harsatna lian tham thleng a awmlo a ti a, ram thenawm buaina avangin ruihhlo leh dan phalloh thil chi hrang hrang thleng avangin venhimna kenkawh kawngah uluk zual a ngaih thu a sawi a, Mizoram Police ten dan lova lo lut tih tawp kawngah theihtawp an chhuah tih a sawi.

Pu Anil Shukla chuan Criminal Law dan thar 3 chu nikum July ni 1 atang khan ramchhung hmun dang rualin Mizoram ah pawh hman ve nghal ani a ti a, Case hrang hrang ziahluh tawh niin tun dinhmunah Criminal Law dan thar 3 hnuaiah case 1500 chuang ziahluh tawh a ni a ti a, Mizoram hmun kilkhawr internet that lohna ah a nihna ang tura Criminal Law thar 3 chu hman a harsat thu sawiin hengah hian hmasawna tur hrang hrang ngaihtuah a ni dawn tih a sawi.

DGP chuan vawiin leh naktuka Mizoram Police Conference an buatsaihin a tum ber chu Police hrang hrangte intuaitharna leh mawhphurhna inhrilh tharna hun a ni a ti a, Criminal Law dan thar an hman tak hnua a

kenkawh dan tur leh dan hnuai hmalak dan tur hrang hrang inzirtir a ni a ti bawk.

Pu Anil Shukla sawi danin Session chhung hian Mizorama dan kenkawh dan tur hrang hrang leh hmasawna tur hrang hrang in zirtir ani dawn a ti a, dan loa Mizorama thil chi hrang hrang lakluh kawnga hmalak dan tur ruihhlo do chungchang bakah khawtlang him zawk a awm theihna tur chungchang te pawh sawiho a ni a ti bawk.



ICT MINISTER

ICT Minister Dr. Vanlalhlana'n sawrkar thar a pian hnuah aikal chhawr tihtawp leh pisa kai hun chhung en thlithlai a ni a ti a, hemi atana hmanraw tha ber chu tunlai thiamna hman tangkai ani tih a sawi.

New Delhi-a Central Institute of Educational Technology (CIET) a tlawhna-a National Council of Educational Research and Training (NCERT) hotute nen an inkawmna ah he thu hi sawiin Minister chuan Mizoram sawrkarin Kai app chu pisa kai hun thlithlai nan tangkai takin a hmang a ti a, Vidya Samiksha Kendra nen zirtirtute hman bik tura thlunzawm tum mek ani tih sawiin Mizoram hmasawn ngaihna tur ni a an hriatte chu a hnena thlen hreh lo turin a chah a; School Education Department hnuai thawktute nen theihtawp chhuaha bawhzui zel an inhuam thu a hrilh a ni.

He hunah hian NCERT-in zirna hmanrua pangngai piah lama zirtirna an kalpui dante, DIKSHA portal kaltinga digital education content siama dah chhuah a nih dan bakah zirlai leh zirtirtute tana tunlai thiamna hmanga zirtirna hman tangkai a nih dante sawiho a ni a, ram pum huapa Vidya Samiksha Kendra (VSK) kalpui a nih dan leh Mizorama hman a nih dante sawi ho a ni bawk a. VSK hi tunlai thiamna hmanga school zirtirtute leh school dinmun en thlithlaina niin, data hmanga thutlukna siamna tur leh zirna chungchanga sawrkar tha tihchakna tur leh langtlang sawrkar siamna tura hmanraw pawimawh tak a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah thin a ni.

Zanin dar 6 leh a chanve-ah Chanchinthar hi puan leh a ni ang.



EXOTIC ANIMALS

Nimin khan Champhai Forest Division a thawkte leh Assam Rifles tangkawp chuan Zokhawtharah dan lova ramsa tawlhruk hrang hrang an man.

Thuchhuah tarlan danin ramsa tawlhruk an man te hi Albino Burmese Python – 1, African spurred tortoise-27 leh Patagonian mara-3 te an ni a, hemi kawnga inhnamhnawih Zokhawthar lam mi 6 te chu man nghal niin Judicial Magistrate, Champhai Judicial District thupek angina Champhai District Jail-ah a dah an ni.

Thudawn danin heng ramsa tawlhruk an man te hi international market ah chuan cheng nuai 130 man hu nia chhut a ni.

Hetihlai hian March ni 26 khan Khawzawl Wildlife Division staff te chuan Wildlife (Protection Act -1972 kalh a Khawzawl rama sakhi leh Varung kaptu Biakchungnunga, Khawzawl ,Lungvar Veng chu a sa kahhlumte nen an man a. Champhai District Court thupek angin Champhai District Jail-ah dah a ni bawk.

